

Julle kan maar land!

POTCHEFSTROOM - Die mense onder ons wat nie aan wonderwerke glo nie, kan gerus hul hoed hoog lig vir die ingenieurs, bestuurders en die werkers van Als en FD Civils wat by die verlenging van die aanloopbaan van die vliegveld van Potchefstroom betrokke is.

Die werk aan die 345 meter waarmee die aanloopbaan verleng moes word om die vliegtuig van die Spaanse sokkerspan vroeg in Junie te akkomodeer, nader vinnig voltooiing. Die Hoofbestuurder van Als Paaie, Danie Wahl, het gister gesê dat hulle aanstaande week die teer gaan gooi.

"In gewone omstandighede sou so 'n projek tenminste 6 maande duur om te bou, maar ons behoort dit binne 77 dae (11) weke klaar te maak", het Wahl gesê. Die aanloopbaan van 345 meter, wat veiligheidszones van 25 meter insluit, is sowat 6 meter gelig en daarvoor is daar 100 000 kubieke meter grond ingery. Dit is 10 000 vragte met vragmotors wat 10 ton kan dra. Om dit te kon doen, moes daar die afgelope weke sowat 630 vragte per dag aangery word.

Verder is daar ook 130 meter se pyp gelê om die kanaal wat daar loop te akkomodeer om onder die aanloopbaan deur te loop.

Theo Venter, wat namens die Noordwes Universiteit by die projek betrokke is, het gister gesê dat min geglo het dat hulle dit sou kon doen, maar met die hulp van die kontrakteur is die laaste struikelblok wat daar was, uit die weggeruim.

Volgens Venter is die gewig van die vliegtuig by landing ongeveer 40 ton wat die nuwe aanloopbaan sal moet kan hanteer. "Die sterkte van die nuwe gedeelte is presies soos die huidige een en daar kan C130 vliegtuie van die Lugmag reeds land", het hy gesê.

Die span wat aan die projek werk is kan voorwaar baie trots op wat hulle in dié tyd vermag het. Potchefstroom se mense het weer gewys dat min dinge nie deur hulle gedoen kan word nie.



'n Baie tevrede span wat aan die projek vir die verlenging van die aanloopbaan van die lughawe van Potchefstroom werk. Van links is Nico Smith (Projekbestuurder, Als), Chris Nel (Veiligheidsoffisier), Theo Venter (NWU), Thomas Muswede (Lughawebestuurder), Wilfred Nyati (Lughawe Suprentendent) en Danie Wahl (Hoofbestuurder Als Paaie).